



西湖志

ル 5  
1100  
16



1110  
15

1100  
16



西湖志卷之三十八

藝文

詩 七言絕句

湖中自照

唐白居易

重重照影看容鬢  
不見朱顏見白絲  
失却少年無處覓  
泥他湖水欲何爲

杭州同舫

唐白居易

自別錢塘山水後  
不多飲酒懶吟詩  
欲將此意憑迴棹  
報與西湖風月知

春日錢塘雜興

唐 施肩吾

西隣年少問東隣柳岸花隄幾處新昨夜雨多春水闊  
隔江桃葉喚何人

僧有示西湖墨本者就孤山左側林蘿祕邃間狀

出衡茅之所且題云林山人隱居謹書二韻以

呈之

宋 林逋

泉石年來偶結廬冷挨松雪瞰西湖高僧好事仍多藝  
已共孤山入畫圖

孤山從上人林臺寫望

宋 林逋

林表秋山白鳥飛此中幽致世還稀誰家岸口人煙晚  
坐見漁舟兩兩歸

寄錢唐春遊詩呈南陽郭待制

宋 蔡襄

一春遊覽足詩歌寄與南陽遠思多若憶錢唐曾到處  
西湖仍是舊煙波

西湖絕句

宋 蘇軾

春來濯濯江邊柳秋後離離湖上花不羨千金買歌舞  
一篇珠玉是生涯

與莫同年雨中飲湖上

宋 蘇軾

到處相逢是偶然  
夢中相對各華顛  
還來一醉西湖雨  
不見跳珠十五年

飲湖上初晴後雨二首

宋蘇軾

朝曦迎客宴重岡  
晚雨留人入醉鄉  
此意自佳君不會

一盃當屬水仙王

湖上有水仙王廟

水光潑灩晴方好  
山色空濛雨亦奇  
欲把西湖比西子  
淡粧濃抹總相宜

夜泛西湖五絕

宋蘇軾

新月生魄迹未安  
纔破五六漸盤桓  
今夜吐豔如半璧

游人得向三更看

三更向闌月漸垂  
欲落未落景特奇  
明朝人事誰料得  
看到蒼龍西沒時

蒼龍已沒牛斗橫  
東方芒角升長庚  
漁人收筒未及曉

過船惟有菰蒲聲

湖上禁漁皆盜釣者也

菰蒲無邊水茫茫  
荷花夜開風露香  
漸見燈明出遠寺  
更待月黑看湖光

湖光非鬼亦非仙  
風恬浪靜光滿川  
須臾兩兩入寺去  
就視不見空茫然

泛舟錢唐西湖

宋 黃裳

望湖樓上與雲齊  
下視銀河一道低  
好是水邊歌舞後  
綺羅人在畫欄西  
俄起谷風斜撼竹  
驟來時雨碎敲蓬  
回頭已見煙雲合  
點檢天邊失數峰

憶西湖舊遊

宋 文同

西湖晴碧晚溶溶  
與客常來坐好風  
記得有人歌小玉  
月明猶在畫船中

四月望再游西湖

宋 陳造

前時小舫冒氛昏  
重到輕橈破麴塵  
湖面風煙飽姿態  
一番到眼一番新

疇昔相期襍被來  
飯餘歸意類擠排  
蘋風蘿月孤清夜  
僅見山間結夏齋

堆青泛碧放船蓬  
萬里風前鶴髮翁  
絕境滿前官不禁  
此身未省歎途窮

春光陸續委東流  
看到湖邊安石榴  
更與蘇隄鷗鷺約  
辦舟來賞牡丹秋

泛湖

宋 陳造

浦瀲樓臺遠近殊樽壘隨處小  
脚躡高郎頗勝高常侍  
解把西湖敵孟諸

酒邊涼意雨餘生望夜重期看月明  
安得水仙會解事  
巧隨人意作陰晴

玉人罷浴試梅纈詩客揮毫落夜光  
因病覆觴今破戒  
為渠豪飲為君狂

樓前行客盡擡頭樓上齊聲唱石州  
滾遍停催猶未徹  
暑風晴月各新秋

次韻樸翁

宋陳造

幾向西湖艤畫橈冰奩儼受眾峰朝  
即今去雁將清夢  
飛下長橋更短橋

泛湖

宋陳造

荷面跳珠小濺衣酒邊團扇已停揮  
濕雲收盡人間暑  
却度西山載雨歸  
底許行庖旋不空小舟如織浪花中  
盤珍俎實隨供給  
亦有紅衣載短篷

宿錢唐尉廨

宋陳師道

平湖遶舍山無益官事長閑俸有金  
安得終身為禦寇

不辭兒女作吳音

題湖上壁

宋 周紫芝

寒食風埃滿客巾  
西湖煙雨送愁頻  
日高未起鳥呼夢  
春晚不歸花笑人

湖居無事日課小詩

宋 周紫芝

春湖潮滿入青天  
浪泊東風打釣船  
人在空濛飛絮裡  
鳥啼紅白亂花前

天色陰晴不可猜  
兩番雲黑又雲開  
鷺從落日山邊去  
魚趁晚湖潮裡來

茶了詩窗飯後杯  
兒書未熟急須催  
鳥於花外喚客出  
山自眼前將句來

老向華胥占一窗  
無心更夢小行郎  
城居可是湖居好  
詩味頗隨茶味長

多情白鳥去還來  
無事風扉閉復開  
山下一帆衝雨過  
水邊雙燕得泥回

將別湖居二首

宋 周紫芝

昔年嘗判武林憑  
來作西湖寺下僧  
又作移家新活計  
却攜行腳舊枯藤

西子湖邊一短窗幾年和雨看湖光青山換得微官去  
魚鳥應須笑漫郎

雨中湖上晚歸書所見三絕句

宋 周紫芝

菰蒲風裏櫂歌遲屬玉雙飛欲暮時荷葉吹香送歸客  
片雲催雨濕燕姬  
誰家歌管載涼州何處跳珠旋入樓山雨忽隨雲渡嶺  
明眸還與水爭愁  
風荷憶伴醉顏紅湖水重來照雪翁與世相看最長久  
只應南北兩高峰

西湖春事

宋 周紫芝

兩高南北擁煙鬟渾在溟濛細雨間寄語丹青王右轄  
不須水墨畫春山  
老去無心作好春曉來風雨故欺人從教髮白桃花笑  
不管簾垂燕子嘖  
顛春柳絮風前落卧水桃花鑑裏開沙上鴛鴦忽驚起  
背人飛出不回來  
半垂羅幕護紅粧閑繫青驄在綠楊樓上日長時度曲  
路邊風過忽吹香



西湖志 卷三十一  
湖居春晚雜賦

宋 周紫芝

雪屋臨湖夜繫船  
柳汀吹絮又經年  
白鷗大似知人意  
分與滄波十里天

雨後春湖拍拍流  
近門誰繫兩三舟  
水邊寒食飛雙燕  
柳外斜陽卧一牛

數日東風緊閉門  
小桃知有一枝新  
花飛不復到老眼  
可是春寒欺得人

倚牀相伴一枝藤  
強作春遊老不能  
花底嬋娟詩嫵媚  
枕中日月睡蒼騰

湖上雜賦三首

宋 周紫芝

青腰載雨入菰蒲  
旋斫漁竿學釣魚  
小向湖心作客與  
天教來此伴春鋤

山邊騎馬醉王孫  
湖裏撐船晚過門  
寄語金丸莫輕彈  
我無花鴨解人言

三年原不下胡牀  
飲盡山光與水光  
莫把渠儂作官看  
此身便是賀知章

西湖詞

宋 周紫芝

吳中小女結煙鬟  
自打青腰唱採蓮  
欲趁歌聲過南浦

藕花深處不通船

湖天無盡月如霜  
露濕荷花別是香  
何處漁郎解吹笛  
並頭驚起兩鴛鴦

西湖月夜

宋 周紫芝

月到中天火未流  
水邊風露已含秋  
問誰乞取西湖角  
紅藕花中着釣舟

寄題西湖并送淨慈顯老三絕

宋 范成大

南北高峰舊往還  
芒屨踏遍兩山間  
近來却被官程累  
三過西湖三見山

膏肓泉石癩煙霞  
半世游山不着家  
老入蒲團三昧近  
坐看穿膝長蘆芽

中秋月了又黃花  
卯後新醅午後茶  
倒沒工夫談不二  
文殊休更問毗耶

湖中微雨戲作

宋 陸游

搓罷青梅指爪香  
一杯聊復答年光  
莫言老子無人顧  
猶得西施作淡粧

春日絕句

宋 陸游

介亭南畔排衙石  
剝蘚剜苔覓舊題  
讀罷南豐數行字

滿山煙雨共淒迷

出城

宋張九成

不出柴門近兩旬  
江邊柳色已窺人  
却思歸去西湖上  
剩把長條醉幾春

晚至西湖惠照寺石橋上

宋楊萬里

船於鏡面入煙叢  
寺在湖心更柳中  
暮色欲來吾欲去  
其如南北兩高峰

西湖晚歸

宋楊萬里

際晚游人也合歸  
畫船猶自弄斜暉  
西湖兩岍千株柳

絮不因風暖自飛

清曉湖上

宋楊萬里

山腰輕束一綃雲  
湖面初顰半蹙痕  
未說湖山佳處在  
清晨湧出小金門

菰月蘋風逗葛裳  
出城趁月上番涼  
荷花笑沐燕支露  
將謂無人見曉粧

六月西湖錦繡鄉  
千層翠蓋萬紅粧  
都將月露清涼氣  
併作侵晨一噴香

庚戌正月三日約同舍遊西湖

宋楊萬里

不到西湖又兩年西湖風物故依然道傍松檜俱無恙  
笑我重來雪滿顛

春光欲動意猶遲未許游人恨見伊只有梅花藏不得  
隔離穿竹出橫枝

黃金勝揭集芳園只隔墻頭便是天西母雲車寒未降  
鶯花作意辦新年

南北高峰巧避人旋生雲霧半腰橫縱然遮得青天面  
玉塔雙尖分外明

下竺泉從上竺來前波後浪緊相催泉聲似說西湖好

流到西湖不要回

上竺諸峰深復深一重一掩翠雲襟只言人跡無來路  
動地鐘鳴作梵音

樹生石上土全無只見青葱不見枯好在冷泉亭下水  
爲渠憑檻數游魚

闌住清泉似鏡平闌開奔浪作潮聲放開一板還收去  
依舊穿沙繞石行

雨中出湖上送客

宋 楊萬里

細雨輕煙着地昏湖波真個解生塵淨慈靈隱君休覓

失却諸峰不惱人

秋山

宋楊萬里

梧葉新黃柿葉紅更兼烏柏與丹楓只言山色秋蕭索  
繡出西湖三四峰

同君俞李永步至普濟寺晚泛西湖以歸得四絕

句

宋楊萬里

閣下微陰不碍晴杖藜小倦且須行湖山有意當君款  
約束疎鐘未要聲

煙艇橫斜柳港灣雲山出沒柳行間登山得侶游湖好

却是湖心看盡山

西湖秋老爲人容不必花時十里紅捲起郭西真水墨  
枯荷折葦小霜風

曲曲都城綠翠微鱗鱗湖浪動斜暉天寒日暮游人少  
兩岸輕舟星散稀

同岳大用甫撫幹雪後遊西湖早飯顯明寺步至

四聖觀訪林和靖故居觀鶴聽琴得四絕句時

去除夕二日

宋楊萬里

湖暖開冰已借春山晴留雪要娛人昨游未當清奇在

踏凍重來眼却新

紫陌微乾未放塵青鞵不惜浣泥痕春風已入寒蒲節  
殘雪猶依古柳根

冰壺底裏步金沙直到林逋處士家未辨寒泉餞秋菊  
且將瘦句了梅花

道堂高絕俯空明上下躋攀取意行靜閣虛廊人寂寂  
鶴聲斷處忽琴聲

上已同沈虞卿尤延之王順伯林景思游湖上得  
十絕句呈同社

宋 楊萬里

鵲袍林裏遇芳辰聞道春來不識春及至識春春已老  
於中吏老是詩人

總宜亭子小如拳着得西湖不見痕湖上軒窗無不好  
何須抵死揀名園

孤山山後北山前十里長隄隔兩邊一行垂楊綠無縫  
石橋通處過春船

天色鬢鬆未肯收吾儕自樂不曾愁隨宜旋旋商量着  
晴卽閑行雨卽休

籃輿休上馬休騎濕却青衫也不辭揀取雨絲疎處去

攜筇到得水仙祠

雨催杖履却須回捲上疎簾眼頓開十里湖光平似鏡  
柳梢梢外一船來

湖上春游只愛晴何朝何夕不清明絕憐疎雨微雲裏  
點綴湖山分外清

憑久欄干可一杯湖山飛入水中來多情燕子能相勸  
舞破東風去却回

今年山路少人來酒肆蕭然綺席埃政爾坐愁春寂寞  
畫船簫鼓忽如雷

岸上湖中各自奇山觴水酌兩皆宜只言遊舫渾如畫  
身在畫中元不知

趙達明太社於四月一日招遊西湖

宋楊萬里

今日清和和又清王孫領客出都城好天勝日能多少  
三到西湖始一晴  
畫舫侵晨繫柳枝主人生怕客來遲嬌雲嫩日無風色  
幸是湖船好放時

船從泳澤過孤山徑度琉璃一簾間隔岸多情楊柳樹

西湖志 卷三十一  
向人招喚俯煙鬟

御池水滿苑門開泥帶飛花露帶苔到得孤山翻作惡  
海棠鬧日不曾來

萍生兒子點疎星荷捲文書走萬丁回首南高峰上塔  
手中攀得玉玲嬋

橘花如雪細吹香杏子團枝未可嘗行到陳朝枯柏處  
孤山山背水中央

和靖先生墳已荒空餘松竹故蒼蒼王孫自洗鷓鴣杓  
滿酌眞珠酌一觴

行盡孤山碧四圍却尋初路得來時好風借與歸船便

吹近瓊林却不吹

聚景園前小泊

風撩木葉小荷欹日麗長楊花影低闌入苑中啼不住  
恨身不及一黃鸝

葱籠晚色正佳哉苦被歸鞍緊緊催船壓浮荷沉水底  
須臾船過却浮來

西湖

宋王炎

浮舟特地出西湖欲訪山中幽子居山色湖光渾似舊  
人間萬事有乘除



湖上寓居

宋 姜夔

荷葉披披一浦涼，青蘆葉葉夜吟商。  
平生最識江湖味，聽得秋聲憶故鄉。  
湖上風恬月淡時，卧看雲影入玻璃。  
輕舟忽向窗邊過，搖動青蘆一兩枝。  
秋雲低結亂山愁，千頃銀波礙不流。  
隄畔畫船隄上馬，綠楊風裡兩悠悠。  
處處虛堂望眼寬，荷花荷葉過闌干。  
遊人去後無歌鼓，白水青山生晚寒。

輦路垂楊兩行栽，苑門秋水欲平階。  
朝朝南望宮雲起，白鳥一雙山下來。

微波衝得綠萍開，數點青青黏綠階。  
綠葑自來還自去，來時須載白鷗來。

苑牆曲曲柳冥冥，人靜山空見一燈。  
荷葉似雲香不斷，小船搖曳入西陵。

處士風流不並時，移家相近若依依。  
夜涼一舸孤山下，林黑草深螢火飛。

卧榻看山綠漲天，角門長泊釣魚船。  
而今漸欲拋塵事，

未了菟裘一悵然

指點移舟着柳隄美人相顧復相攜上橋更覺秋香重  
花在西陵小苑西

大雪趙振文寄詩言乘月泛舟清甚因次其韻

宋樓鑰

雪光絕勝水銀銀未覺仙家隔一塵真境宜君着佳句  
賞心樂事更良辰

見說中宵泛綵舟何人同賞大江流陽冰伯雪應為伴  
更約禪人白道猷

舊聞老具擅詩聲夜泛錢塘向鳳城今日清遊更豪逸

雪花和月帶潮生

法具字圓復紹興初詩僧也有月夜游錢塘詩云小舟為我載月色白沙

翠竹光相射自從李白下金陵四百年無此豪逸

大雪趙振文寄詩言乘月泛舟清甚次自韻

宋樓鑰

老我心知筆力衰頗欣臘雪瑞清時三茅奇觀亦難遇  
白玉峰頭燈萬枝

萬玉貞妃搖佩琚梁園授簡屬相如莫嫌一水限吳越  
兩岸交輝合太虛

湖上

宋 劉過

五行撩我到錢塘花底題詩句亦香莫惜高吟三十韻  
敢煩詩伯為平章

西湖

宋 劉過

西湖湖上山如畫二十年前曾客來飛絮滿城歸未得  
江南老卻賀方回

題臨安西湖

宋 高孝璫

朱簾白舫亂湖光隔岸龍舟艤夕陽今日歡游復明日  
便將京洛看錢塘

夏日西湖閑居十首

宋 汪莘

十里西湖苦見招柳隄荷蕩赤欄橋待他朝市人歸後  
獨泛扁舟吹玉簫

急管繁絃樽俎間何人靜眼對湖山怪來水面無鷗鷺  
多在殘蒲落照灣

每歎西湖境未殊向來人物有還無紅蕖綠竹渾相得  
明月清風亦不孤

晚風吹動碧琳寒初日花房露未乾誰道幽人無伴侶  
紅蕖萬朶竹千竿

修竹祠堂曲水濱寒泉菊盞久埃塵道旁車馬無心到  
似我頻頻有幾人

一曲波光徹太虛四垂碧漢罩湖魚游人眼被荷花礙  
不覺琉璃泡裏居

露冷風清斗柄邊芙蓉零落謝家船都人正作黃梁夢  
獨占西湖明月天

清夜湖心把酒杯花間風月共徘徊金鐘何事催天曉  
又恐遊人相逐來

醉把青荷當箬笠亂披綠芰作蓑衣漁翁家在蓬瀛上  
欲駕蓮舟一葉歸

藕帶嚼來殊解渴荷香聞得亦忘饑幽人不趁槐花課  
收得西湖幾句詩

湖山早秋偶興

宋汪莘

坐卧芙蓉花上頭清香長遶飲中浮金風玉露玻璃月  
併作詩人富貴秋

湖上

宋方岳

沙暖鴛鴦傍柳眠春來亦懶避湖船佳人窈窕矜顏色  
自照晴波整翠鈿

今歲春風特地寒，百花無賴已催殘。  
馬腔曉雨如塵細，處處筠籃賣牡丹。

輕塵不動雨霏微，隄外芹香燕子飛。  
庭院日長簾幕靜，含情脉脉看春歸。

綠波如畫雨初晴，一岸煙蕪極望平。  
日暮落花風欲定，小樓絃管壓新聲。

連天芳草晚萋萋，蹀躞花邊馬不嘶。  
蜂蝶已歸絃管靜，猶聞人語畫橋西。

游人抵死惜春韶，風暖花香酒未消。  
須向先賢堂上去，畫船無數泊長橋。

鞦韆人散雨千絲，誰把春篁隔院吹。  
但覺小橋煙外柳，春風無力逞腰肢。

過湖

宋 方岳

纔出城來便不同，綠楊微雨藕花風。  
過湖船用百錢買，卧看雲歸南北峰。

西湖春雪

宋 高翥

小艇沿溪春雪飛，正當騎馬踏春時。  
是誰乞與楊花舞，先占東風一月期。

西湖卽事

宋 周文璞

閑看浮鳩栖曲渚倦隨奔鹿上荒陵松門雨過長廊靜  
一架藤花供病僧

西湖秋晚

宋 葉紹翁

愛山不買城中地畏客長撐屋後船荷葉無多秋事晚  
又同鷗鷺過殘年

訪龍井山中村叟

宋 葉紹翁

雨打荒籬豆莢垂柴門未啟立多時客來自掘蹲鴟煮  
旋拾枯松三數枝

西湖

宋 葉茵

湘桃深處五陵家隄柳陰中百寶車多是問桃尋柳去  
近來山下少梅花

送擘冲晦歸天竺

宋 姚鏞

西湖山下多奇石師去今游乳竇峰遙想石臺登講罷  
野猿歸洞鶴歸松

湖上曲

宋 許棐

新隄旋蠟游春屐半濕香泥恰好行琢得小詞腔未穩  
往來花下怯歌鶯

湖上

宋 王同祖

長安三月又三日繡轂狨鞍富貴家笙鼓喧天蘭棹穩  
賣花聲裡夕陽斜  
偶出城來日未西百花叢底草萋萋游人過盡歸來晚  
行遍蘇公十里隄

湖上早行

宋 王同祖

錢塘門外買湖船霧氣衝雲水接天只有蘇隄金線柳  
半籠斜日半籠煙

再行湖上

宋 施 樞

樓臺萬疊照斜暉紅褪園林綠漸肥艷似杏桃開過了  
春風吹到野薔薇

湖中

宋 趙崇鈹

汀蒲獵獵起涼颺碧藕香中獨立時機事兩忘吾亦懶  
扁舟行過水仙祠

湖上新晴

宋 宋伯仁

湖邊膏雨弄晴時桃杏紅爭錦一機楊柳也如新及第  
向人爭舞綠羅衣

湖上

宋 宋伯仁

一泓寒玉浸青山  
粧點樓臺夕照間  
歌管滿船春未懶  
惜無人伴白鷗眠

湖上閑步

宋俞桂

一番雨過一番春  
芒竹閑行踏軟塵  
城裏不知春色早  
湖邊楊柳已撩人

過湖

宋俞桂

舟移別岸水紋開  
日暖風香正落梅  
山色濛濛橫畫軸  
白鷗飛處帶詩來

春日湖上

宋武衍

刺桐花下雨初乾  
寒食游人盡出關  
一片湖邊春富貴  
斷橋船簇夕陽灣

飛鷁鳴鑼鼓吹喧  
繁華應勝渡江前  
吟梅處士今還在  
肯住孤山爾許年

船裏歌聲去復還  
游人樂在酒杯間  
爭如策蹇長隄上  
細看南山與北山

重訪西湖舊遊

宋武衍

西風吹曉鳳城開  
桂子香中信馬來  
十載不行湖上路  
知他添了幾樓臺



湖亭席上贈商素

宋 武 衍

一曲春風已擅場淺顰低嘒更傳觴令人憶殺香山老  
舊日玲瓏也姓商

湖邊

宋 武 衍

日日湖邊上小車要尋紅紫醉年華東風合與春料理  
忍把輕寒瘦杏花

正元二日與菊莊湯伯起歸隱陳鴻甫泛舟湖上

宋 武 衍

春雲漠漠雨疎疎小艇衝煙入畫圖除却淡粧濃抹句

更將何語比西湖

西湖晚望

宋 陳鑒之

過雨長橋葱翠濕小橋人靜支筇立一縷竿頭顛霜鯽  
風動青蒲見篔簹

湖上

宋 徐集孫

不分雨色共晴光每攬吟魂夢草堂數日不來湖上看  
西風次第水蒼茫

馬塍賣花者

宋 李 龔

十里宜春下苑花濃香染着洞中霞採夫攜得將何處

擔入宮城許史家

湖上雨吟

宋 吳惟信

濕了荷花雨便休  
晚風歸柳淡於秋  
一生不作機心事  
合轉船頭向白鷗

西湖

宋 王 鉉

南北高峰叫杜鵑  
斜陽浮翠斷橋邊  
畫船歸處江湖夢  
一半樓臺楊柳煙

湖上晚望

宋 王 鉉

酒醒湖光生嫩涼  
卧船吹笛藕花香  
游人盡逐鶯花去

一片閑情在夕陽

杭州西湖舟中送王本齊之官併呈孟能靜

宋 俞 琰

十年不踏西湖路  
滿眼青山是故人  
今日重來送君別  
一番楊柳一番新

訪西湖

宋 劉 敞

東風吹客到西湖  
汀草沙禽半識吾  
若得數間茅屋在  
種梅花處伴林逋

憶西湖

宋 葛長庚

銀月窺人夜漏沉  
斷蒲疎柳忽關心  
西風爲報西湖道  
留取芙蓉伴醉吟

湖上偶成

宋葛長庚

葭蒲滿蕩起晴煙  
總屬霜鷗雪鷺天  
一片紫菱開十字  
中間放過采蓮船

湖上漫賦二首

宋鄭思肖

蘚崖蒼潤雨初乾  
石罅飛泉噴雪寒  
啼斷禽聲山更靜  
青松影下倚欄干

一望湖光鏡面平  
暮鴉過盡斷霞輕  
狂來飛上高峰頂

跌坐松柯叫月生

湖上晚歸

宋釋道潛

漾舟歸路興何賒  
水木低涼一道斜  
菱蔓蒹葭却卷盡  
芙蓉爛漫獨開花

秋日湖上

宋釋道潛

兩山斜抱翠逶迤  
一水中分似漾陂  
孤榜獨來還獨往  
鷓鴣鷓鴣莫相疑

秋來雙鷺落寒汀  
秋水無痕玉鏡清  
綠蓼黃蘆宜掩映  
沙邊危立太分明

欲跨高樓曠遠情無端秋雨苦冥冥崢嶸日脚漏雲處  
瞥見遙山一抹青

同周湛二上人游西湖之北山天竺晚歸

宋釋紹嵩

行盡孤山碧四圍春光和暖恰相宜微風披拂香來去  
正是羣芳爛漫時  
山如濃翠擁高鬟石壁巉然不可攀落日鳳城佳氣合  
幻成一島畫圖間

和靖先生墳已荒三春花草殿餘芳欄干倚徧斜陽晚

戶牖軒窗總是香

閒來湖上立移時獨媿憑欄負碧漪西寺木魚東寺鼓  
而今總入老夫詩

北山迤邐自蒼然萬象鮮明禁火前愁裡有詩人不會  
欄邊瀟瀟響流泉

天竺橫分景色寬園林初日破朝寒興闌欲下山腰去  
野徑縈迴路百盤

幽刹尋春傍翠微幡竿殘日迴依依西湖兩岸千株柳  
何似先教畫取歸

好是春風湖上亭  
軒窗小憩俗塵清  
湖山有意留儂款  
楊柳飛花亂晚晴

湖上春晚

宋 釋永頤

水邊三月芳菲晚  
楊柳樓船擁萬家  
浩浩歌鐘迷白日  
不知煙寺落桐花

西湖日暮

宋 釋永頤

渺渺春湖夕靄浮  
落花飛燕打蘭舟  
游人半入煙城去  
月照笙歌上水樓

酬蘇屯田西湖韻

宋 釋斯植

雨餘殘景照漁家  
漁子鳴榔徹郡衙  
今夜相呼好垂釣  
晚來新雨漲蒹葭

湖上晚望

宋 釋斯植

繞隄楊柳暗漁舟  
二月風光淡似秋  
幾度笙歌人散後  
夕陽依舊滿紅樓

西湖晚望

宋 釋斯植

久雨初晴睡正長  
春蛙鳴遍舊池塘  
小亭寂寞斜陽裡  
一陣東風過木香

別西湖

金 房 皞

聞說西湖可樂飢十年勞我夢中思湖邊欲買三間屋  
問遍人家不要詩

西湖志卷之三十八

總校王詒壽分校

沈琮寶校  
吳鳳皆

西湖志卷之三十九

藝文九

詩 七言絕句

湖隄雨中夜歸

元方同

夜雨昏昏欲雪天數家燈火北山前鄉心認作桑麻路  
忽有湖船奏管絃

題和靖先生觀梅圖

元仇遠

癡童臞鶴冷相隨笑指南枝傍小溪到處一般香影色  
孤山只在斷橋西

湖居雜興

元仇遠

脈脈吹香屋角梅背風移燭小簾開鳳城幾日元宵近  
一片簫聲水上來

龍舟曉發斷橋西別有輕舟兩兩隨春色可人晴較穩  
酒家爭出柳梢旗

相國平泉竹石居吳山花石世間無遊人馬上休回首  
一半春風在裏湖

雨後林塘夏亦秋一葫蘆酒在船頭醉來深入荷花去  
卧看青天飛白鷗

車魚人散水風腥雨色涼分柳外晴回首夕陽都落盡  
忽然東向數峰明

萬樹芙蓉兩藥宮秋風開遍水邊叢白墻遮盡紅塘出  
只見紅塘一半紅

西湖晚意

元龔璠

天賦幽人事事幽西湖佳處十年留荷香欲老菱如臂  
得意斜陽一小舟

湖上卽事多懷月心之辭

元袁易

月轉山橫湖水明星河倒影玉壺冰故人天末難持寄

西湖志 卷三十一  
來倚高樓第四層

浙東山色渡江青  
眼底新詩向此成  
天盡雲低看鷓落  
日斜風細待潮生

顧盼江湖左右分  
吳山飛雨越山雲  
茲遊覽結風煙秀  
獨自題詩轉憶君

西湖行春

元黃庚

畫船無復沸笙歌  
湖水年年自碧波  
回首蘇公隄上柳  
綠陰不似舊時多

和靖觀梅圖

元吳澄

一枝春信到孤山  
冰雪肌膚不覺寒  
月下水邊看未足  
折來更向手中看

湖上感舊

元陳孚

昔日珠樓擁翠鈿  
女牆猶在草芊芊  
東風第六橋邊柳  
不見黃鸝見杜鵑

西湖雜咏

元湯炳龍

馬塍雞唱曙初回  
幾處嚴關次第開  
多少賣花人已別  
賸將春色入城來

湖上暮歸

元趙孟頫



春陰柳絮不能飛  
雨足蒲芽綠更肥  
正恐前呵驚白鷺  
獨騎欵段遶湖歸

湖上

元胡助

散步蘇隄消永日  
綠陰古木漸成稀  
西泠橋上遇微雨  
却喚扁舟湖裏歸

過西湖

元許謙

不見湖光十五年  
滿隄煙雨復乘船  
蕩荷岸柳渾依舊  
鬢上星星應自憐

西湖絕句六首

元薩都刺

湧金門外上湖船  
狂客風流憶往年  
十八女兒搖艇子  
隔船笑擲買花錢

少年豪飲醉忘歸  
不覺湖船漸漸移  
水面夜涼銀燭小  
越娘低唱月生眉

紫騮驕踏落花泥  
二月江城雨過時  
拂曉市河春水滿  
小船多半載吳姬

惜春曾向湖船宿  
酒渴吳姬夜破橙  
驀聽郎君呼小字  
轉頭含笑背銀燈

待得郎君半醉時  
笑將紈扇索題詩  
小紅簾外春波滌

渡水楊花入硯池

垂柳陰陰蘇小家滿湖飛燕趁楊花繁華一去風流滅  
今日橫隄幾樹鴉

與張伯雨西湖暮歸

元 吳養浩

柳煙淡蕩雨霏微隔水遙看羽蓋飛馬上仙人強支酒  
踏花何處晚來歸

招韓伯清泛湖二首

元 張翥

南園攜手賞芳紅喚取能歌盛小叢樽與春風留杏萼  
明朝開向曲聲中

段橋春水綠初柔更有羣鳧來往遊好借鴟夷盛酒去  
玉簫吹上畫船頭

贈錢唐琴士

元 貢師泰

畫船載酒西湖上一日笙歌幾萬錢獨抱孤桐向何處  
夜深彈月上青天

西湖

元 朱希晦

絲絲細雨弄春晴新水溪頭杜若生我欲與君攜酒去  
綠陰樹底聽啼鶯

和靖看梅圖

元 呂思誠

西泠橋下林家墓猶有舊時無數花孤雲何處雙飛鶴  
落日鷓鴣滿白沙

葛嶺雜書

元張雨

小娃小艇無蹤跡只有荷花雨濺裙淨洗一方天水碧  
不教歌板汗遊雲

荷花詞次韻周伯溫參政

元張昱

朝霞染得好衣裳吹遍湖頭風露香身分可憐年紀小  
纖腰一束鬱金黃

少年慣服白珠砂養得容顏過曉霞生長六橋楊柳岸  
不知湖上是農家  
一種西湖與若耶鴛鴦宿處便爲家秋房結得新蓮子  
便是當時藕上花

西湖春日壯遊卽事

元馬臻

延祐戊午春偶以釣槎之暇因念西湖春日壯遊尙  
歷歷眉睫間光陰幾何余矍鑠矣遂成七言二韻三  
十首以寫幽懷

遶湖無處避芳塵疊鼓紅旗彩鷁新冉冉春雲來不斷  
湧金門外踏青人

霍山廟食慶流虹民物謳歌樂歲豐七寶社回呈了馬  
年年歸路雨和風

南屏山色染春煙路接高峰社鼓喧第一橋邊春更好  
御舟閒在翠芳園

問誰偏解占風光飛蓋金鞍白面郎山北山南遊欲遍  
畫船教艤集賢堂

瑞煙祠宇隱垂楊士女穿花語笑香三十九賢森翠碣  
虛舟亭上借傳觴

鏤玉雕瓊簇鬧竿珠花翠葉縷金籃東家年少貪遊冶

正值明朝三月三

流蘇兩兩挂船頭繡額珠簾不上鈎金縷緩歌家宴靜  
午前先入裏湖遊

紫染春羅窄袖裁伶人楚楚自詠諧部頭教奏金娥曲  
盡向船棚一字排

笙歌簫鼓沸春濤耳目難禁應接勞院落鞦韆誰氏女  
綵繩擲起過牆高

綺陌遊人隘暖煙去年時節賣餠天隣家兒女歸來晚  
買得塘魚折柳穿

萬柳搖金接畫橋一清堂外景偏饒平章太守開華宴  
預報龍舟奪錦標

園丁花木巧栝捲萬紫千紅簇綺筵折得青梅小如豆  
獻來還索賞金錢

揉藍染水翠浮山隄上亭臺錦繡間花柳禁人攀折去  
要留春色大家看

進餘薇露與流香散落人間任品嘗處處旗亭招醉客  
大書不是趕春場

珍禽翠羽養雕籠列向船頭盡不同憐殺錦鸚偏解語

喚人提挈避東風

漱灑春波鏡面平扁舟賣物往來輕翩翩鷗鷺翻晴雪  
慣聽笙歌也不驚

豪家遊賞占頭船趁得風輕放紙鳶手拍絲綸爭上下  
一時回首看青天

乍暖春衫薄似紗少年三五自譁譁醉眠芳草醒來晚  
尙覓魚羹向酒家

嬌民技藝也天生鬪巧搜奇事事能稚子土宜偏戲劇  
浪兒黃累十三層

一路亭臺間酒家漸看楊柳綠藏鴉太平官府無民訟  
補種沿隄十里花

畫船過午入西村人擁孤山陌上塵曾被弁陽摹寫盡  
晚來閑却半湖春

要囑園丁取折枝紅桃白李紫薔薇石涵橋畔人煙晚  
挑得春光一擔歸

遙看暝色下漁汀金鴨香消酒半醒倒轉船頭元有意  
檻邊人報放流星

天街夜市已喧闐半掩城門玉漏傳籠燭絳紗爭道入  
湖心猶有未歸船

鞦韆罷蹴綵繩低林館鶯聲白日遲處處茶蘼開似雪  
不甘便作送春詩

桃杏移春點碧苔柳綿飛盡小池臺憑君莫信啼鶻語  
更有花王最後開

送得春歸夏又初名園不放玳筵虛只知富足家家事  
肯爲兒孫教讀書

誰家乳燕掠船過小小荷錢出水多梅雨乍晴人病酒  
綠陰天氣正清和

慣見升平春復秋分明往事昔年遊  
西林橋外青山色幾度夕陽人白頭

曉過西湖

元 釋圓至

水光山色四無人清曉誰看第一春  
紅日漸高絃管動半湖煙霧是遊塵

題和靖觀梅圖

明 陶宗儀

小朵遙岑隔翠漪背籠衣袖立多時  
暗香浮處催詩句落月昏黃分外奇

和靖擁爐覓詩圖

明 陶宗儀

一童一鶴住西湖千古高風識畫圖  
水影月香成絕唱苦吟猶自擁寒爐

晚秋游西湖二絕

明 李 暉

八月西湖鏡裏天中流柔櫓下輕煙  
回頭指點青山好有箇白鷗飛上船

秋夜西湖泛櫂過滿船星斗近天河  
鳴榔忽動清風起一對鯉魚吹白波

西湖歌

明 梁 寅

美人玉釵燕翩翩白日照耀黃金蟬  
柳絲綠讓雲鬢禪

西湖志 卷三十一  
荷花紅妬茜裙鮮

鶯黃滿壺載船頭酒能解愁人自愁長隄車馬如流水  
朝來莫去幾時休

豔粧緩歌金縷衣舞腰學得燕兒飛湖西日落月東出  
歌舞留人且莫歸

青山入湖湖水青菱花日日照船檣山頭急雨船須住  
水面涼風酒易醒

錢塘城中十萬家碧瓦龍鱗戶綺霞樓頭賣酒船中飲  
不如湖上看繁華

錢塘懷舊

明 銜 績

眉易生愁臉易消一聲歌斷碧雲遙祇今惟有西湖柳  
留得殘枝似舞腰

西湖漁者

明 凌雲翰

家住錢塘西子湖釣竿幾度拂珊瑚扁舟載月歸來晚  
不覺全身入畫圖

西湖

明 廖孔說

水中樹影樹中山山自無心水自閒明月兩隄人不見  
小舟獨向斷橋還



寄王明仲寓杭

明虞堪

西湖何處好題詩  
落日西泠唱竹枝  
團扇晚停眉黛斂  
水寒休弄玉參差

和靖觀梅圖

明謝常

孤山歲晚水迢迢  
竹外橫斜挂綠么  
吟到暗香疎影句  
黃昏月上雪初消

西湖詩篷

明夏時

放棹蘭汀杜若洲  
有詩不用錦囊收  
儘教拋擲東風裏  
近水飛花處處流

詩成倚棹復頻吟  
棹觸風荷躍錦鱗  
老去都忘擷芳意  
放歌何處采蓮人

解纜朝辭學士溝  
湖中畫舫不勝秋  
白蘋風起回汀晚  
泊在蘆花淺水頭

霜晴日出水消波  
景澹煙融入棹歌  
不似灞橋驢子上  
滿身風雪柰詩何

西湖夜宿

明李進

蹇驢衝雪岸烏紗  
夜醉西湖賣酒家  
十六吳姬吹鳳管  
捲簾燒燭看梅花

湖上書愁

明張和

濃如山色亂如雲滿目春愁殢夕醺風雨欲來人不到  
杜鵑啼上岳王墳

湖上莫歸

明劉泰

小驢馱醉踏殘花柔綠陰中一徑斜日莫歸來問童子  
春衣當酒在誰家

春日西湖同項宗彝蔣文偉賦

明劉泰

湖上韶光似酒濃踏花重覓舊遊蹤東風知我堪真樂  
輕約春雲過兩峰

約蘇文定泛湖

明劉泰

西湖山色雨清奇況是梨花酒熟時整頓蘭舟載春去  
莫教鷗鷺笑來遲

春日湖上

明劉泰

浴鵲灣頭盪槳過雨聲昨夜漲湖波落梅天氣寒猶峭  
未許春衣試薄羅  
步逐東風踏軟沙背人驚鷺去斜斜兩株紅杏疎籬外  
知是湖邨賣酒家

小鬟扶起醉曹騰落日寒生半臂綾燕子不來春尙淺

湖陰留得未消冰

櫻桃花發向陽枝便覺韶光暗有期明日重來應爛漫

雙柑斗酒聽黃鸝

載酒過湖

明 鎰 英

寒食清明次第來紫苞紅萼裏池臺東風似與人商略  
最好花教最後開

湖上花開

明 鎰 英

白鷗遙待酒船來芳草汀舟去復回為惜杏花寒勒住  
西陵昨夜一枝開

湖上晚春

明 鎰 英

辛夷塢口春將老躑躅池邊雨弄晴盡日無人過湖去  
黃鸝睨睨不停聲

夏日憶西湖風景

明 于 謙

湧金門外柳如煙西子湖頭水拍天玉腕羅裙雙蕩漿  
鴛鴦飛近采蓮船

邦彥飲湖上暮歸過保叔大呼求見因齋酒出寺

飲之以詩送別

明 史 鑑

半山遙聽故人歌枉駕能為蕭寺過飲酒莫辭還秉燭

重來花事恐無多

寄杭州友人

明史鑑

西湖湖上水初生重疊青山接郡城記得扁舟載春酒  
滿身花影聽啼鶯

湖上莫歸

明史鑑

鴨羣呼去水雲空香滴荷花露氣濃僧寺茫茫看不見  
暮煙生處忽聞鐘

題西湖釣艇圖

明唐寅

三十年來一釣竿幾曾叉手揖高官茅柴白酒蘆花被

明月西湖何處灘

遊湖醉歸

明陳霆

岳武祠前已落暉賞心直待醉時歸六橋楊柳西湖路  
一派涼風吹客衣

憶西湖

明喬時敏

柳色青青映客衣鷓鴣聲裏夕陽微桃花隔岸輕舒笑  
還憶蘇隄送客歸

湖上偶成

明薛章憲

舞風楊柳軟腰肢映水桃花好面皮一抹晚山橫翠黛

西湖端合比西施

湖上漫興

明  
李夢陽

西湖湖上楊柳枝臨流嫋娜風更吹只愁白雲漫天舞  
不怕黃金拂地垂

西湖歌

明  
張文宿

西湖佳麗屬錢塘一決沙河隔混茫流下石函高十丈  
恰如天上瀉銀潢  
列區上應斗牛文水接仙源八派分開倚鵲樓舒遠眺  
碧波寒浸兩峰雲

晶渺寒波靜不流分明一鑑地中浮光涵寶月三千頃  
影落珠簾十二樓

千樹桃花錦作隄遊人錯認武陵溪春風不獨披蘂棹  
更送香塵逐馬蹏

隄上垂楊拂畫橋上通車馬下通橈倚欄夜半吹明月  
借得仙人白玉簫

風日春情挾霧開笙歌相競畫船來早間盡往南山去  
晚間遙自北山來

積雨不能出有懷湖上

明  
沈淮

霞樓月榭欲生塵水上煙雲積幾旬滿地山花應笑我  
雨中春色屬他人

次韻西湖

明 管 浦

白雲一徑穿林薄流水籬根送落花草色壓簾春寂寂  
鳥聲啼滿野人家

和人招遊西湖韻

明 鍾 禧

湖光山色最宜秋君不來招也去遊已辦蜀川千丈錦  
為誰今日盡纏頭

萬頃西湖水貼天芙蓉楊柳亂秋煙湖邊為問山多少

每箇峰頭住一年

泛湖

明 薛應旂

孤山樹合仙人宅雙塔雲開玉女臺小艇中流風欲定  
漫驚鷗鷺一徘徊

西湖聞笛

明 范 言

月白霜寒客夢醒笛聲迴出柳洲亭莫教吹過孤山去  
風裡梅花不耐聽

西湖詞

明 周 詩

欲雨不雨雙峰孤遙天幻出青珊瑚仙人九節杖可借

西上峰頭看海枯

西湖曲

明屠隆

停橈湖上踏歌行  
湖草離離湖水清  
一片紅蕖香杳藹  
花間轉出珮環聲  
大隄楊柳映紅霞  
萬井樓臺千樹花  
費盡黃金買歌舞  
畫船強半載琵琶  
零落釵鈿香粉消  
明朝猶自艤蘭橈  
年年歌舞馳波去  
留得寒煙鎖六橋

西湖歌

明王叔承

蘇小墳西是妾家  
門前多種白蓮花  
郎來好認當鑪處  
石上瑤琴覆落霞

贈孟嘉訪開之湖上

明沈懋學

初陽臺上紫雲停  
何處瑤簫入夜聽  
載酒看花歌白紵  
直教明月下西泠

浮梅檻爲貞父作

明湯顯祖

白傅時思湖上眠  
黃郎新泛竹爲編  
長垂布幔通明月  
何用籠燈照夜船

靈隱山前風日飄  
不須剡木取泉遙  
猶憐入夜蕭蕭雨

長在西泠第幾橋

十月十五夜同印持子將諸兄弟自靈隱步月至

上天竺口占

明李流芳

冷泉亭畔樹初明  
百道寒光水面生  
松月似留人住住  
溪聲却喚我行行

鑪頭曲

明胡頴嘉

西子湖頭日欲昏  
桃花爭艷柳爭繁  
東鄰歌舞春應滿  
蕭瑟朱弦獨閉門

可憐憔悴倚欄干  
誰解東風共往還  
朝想爲雲暮爲雨

西湖黯淡接巫山

西湖雜咏二首

明宋珏

雲合雲開樓上下  
月升月落榻東西  
側身枕畔低迴看  
身與雷峰塔頂齊

倦將書卷引閒眠  
枕上青山几上煙  
午夢似醒醒似夢  
濕雲如水水如天

早春武林山遊

明李衷純

曲磴捫蘿曉色分  
翠微深處鹿麋羣  
山家煙火炊松子  
野寺鐘聲散碧雲



虬枝十萬插青霄為雨為雲白日搖忽振雄風空谷裡  
錢塘江湧伍胥潮

湖上晚秋

明 俞行之

湖隄前度踏殘春煙柳風花最惱人今日南屏露眞色  
碧雲紅樹一番新

盈盈秋水淨如鋪荷葉菱花一半枯惟有斷橋金線柳  
淡煙猶鎖亂啼烏

題扇送客懷長蘅湖上

明 程嘉燧

送客西樓落木風髣絲吹斷酒巾空危廊千尺雲居寺

霜葉仍欺二月紅

約看西湖十月紅掉頭歸計又成空年光如水心如夢  
人在西樓暮雨中

西湖雜題

明 程嘉燧

風隄霧塔欲分明閣雨縈陰雨未成我試畫君團扇上  
船窗含墨信風行

鮑谿文扇

西湖詞

明 陳九德

西湖日落鏡光斜少女新粧似浣紗乘却蘭舟蕩蘭漿  
約開蓮葉採蓮花

湖上人家帶夕暉野鷗相對亦忘機微風不動波澄碧  
水底青林開竹扉

夜泛西湖

明董斯張

放棹中流月滿衣千山無色暮煙微二更水鳥不知宿  
還向望湖亭上飛

南屏歸艇遇雨

明譚貞竝

望裏南宮潑墨山小窗殘燭放舟還從容畢竟輸漁父  
藕葉菱花泊淺灣

西湖夜別

明顧猷

水落西陵日已斜濃煙疎柳半藏鴉相逢莫謾輕相別  
燈火湖頭是酒家

西湖曲

明龔士驥

六橋羅綺媚晴霞彩袖風翻一向斜四百亭臺何處勝  
香車未到莫飛花

西湖

明崔桐

湖冷山光岸帶沙石扉茅屋野人家短牆不解遮春色  
露出早梅開白花

春朝過雨送輕寒半落桃花桑葉團多少樓臺山色裏

西湖志 卷三十九  
畫船移傍六橋看

四山花鳥弄新晴  
煙處湖光半繞城  
醉飲春風歸去晚  
松聲一路送遊人

西湖月夜

明祝淵

落月粼粼水面浮  
露華濃滴桂叢秋  
不知何處鳴柔櫓  
驚起一雙雪色鷗  
佛火漁燈漸寂寥  
推篷起坐已中宵  
夜來極浦灘聲急  
知入西泠第幾橋

西湖晚行

明釋清澹

海角曠曠日欲生  
山南山北淡煙橫  
春風吹斷沙禽夢  
人在綠楊隄上行

西湖雜詩

明釋來復

芙蓉灣口綠陰斜  
吹邃何人隔綵霞  
驚起沙頭雙翠羽  
銜魚飛上刺桐花  
流觴亭子鳳山阿  
都護行春小隊過  
笑擲金錢花底醉  
玉簪彈出白翎歌  
雨後湖隄樹色寒  
杏花風颺酒旗竿  
紅船載月無絲竹  
埜水疎籬正好看

蜃霧初消海日升  
隔江山色是西陵  
潮生潮落無今古  
似與人間說廢興

西泠橋下水生煙  
屬玉飛來近釣船  
荒盡梅花三百樹  
孤山無地訪逋仙

國朝

西湖泛月

范承謨

團團十里畫青山  
遍插荷花遶水灣  
莫怪遊人清興遠  
扁舟更載月明還

南屏佛寺

張丹

宿雨寒煙帶古松  
長廊僧起一聲鐘  
殘經未了聽齋板  
人住南屏第幾峰

春遊詞

張遂辰

松木場灣春樹濛  
燒香船鼓酒旗風  
接河客路紅塘上  
半郭人家綠雨中  
湧金門外百花明  
岸笛舟燈任雨晴  
莫怪一春人太惜  
風光不易是昇平  
二月湖光最可憐  
桃花港口楸頭船  
不知誰是無情物  
只怪春風費酒錢

西湖志 卷三十九  
花時常惜雨無聊愛此春晴不隔朝欲問風光何處勝琵琶消盡第三橋

家家寒食惜春遊爭說風光無計留底事酒闌歸未晚桃花拊束滿船頭

樓外樓高柳撲天兩隄如帶鎖春煙珠簾素面歌聲裏日出花梢過酒船

望湖亭下草平波日午樽罍此地多爭看踏繩臺上妓一時艇子掠風過

昨來淥水雨初肥荷葉菱絲青貼隄日暮酒樓誰

不上遊船齊泊畫橋西

西冷橋外美人家三五歌筵幾鈿車常喜月生遊客盡手揮紈扇詠桃花

數錢不用灑春灰脫殼鵝兒瀉臘醅犯卯未醒人正倦楊梅如雪隔江來

月明風熟符箒路飯細魚香菡萏天一片煙波拋不得牽船日日住湖邊

斷橋燈火沸歸船橋上人多聽管絃我愛春星人靜後隔塘孤槩響空煙

西湖志 卷三十九  
湖上同然明

張遂辰

幾年湖上與君同  
日日煙光攬不窮  
花片柳絲人面月  
短簫橫笛酒旗風

八月汪上舍招同諸公夜泛五首 朱彝尊

青驄斜日盡迴鞭  
錦瑟中流罷合絃  
誰似汪郎苦留客  
夜深猶放總宜船

湘湖遺老

毛叟奇齡

舊清狂白髮相逢  
筍蕨鄉已分今

宵共沉頓不妨跋扈少年場

西泠橋外柳娟娟  
宿霧迷濛月一弦  
陌上花鈿如

可拾安知老子定無緣

蠟燈何處送歸艎  
一道萍開燕尾香  
寄語紅窗休度曲  
隔船回顧有周郎

湖心亭子靜無塵  
更上層樓算酒巡  
好趁三潭涼月色  
白銀盤裡采香尊

毛大可招飲湖舫同錢宮聲倪魯玉聶晉人

尤侗

偶逐良朋載酒遊  
風來水面好勾留  
傍人指點蘇隄畔  
尙繫迎

鑿雲母舟

十里荷花柳七詞至今猶放兩三枝此中消夏差  
堪可高卧孤山月上時

湖上春詞

洪昇

滿湖春水蕩晴煙幾處春雲散碧天月出慣留歌  
舞席風生不送別離船

寓昭慶招同西厓泛舟湖上得六絕句

朱昆田

湖雲湖雨催輕櫂愁水愁風換夾衣除却顛狂二

三子誰將眠具出城扉

茶籃酒榼攜菱角漁弟樵兄唱竹枝始悔紅塵長  
插脚十年纔得一軒眉

擘絮雲遮紅杏寺帶絲禽泊紫菱灣好景眼前誰  
畫得徐熙花鳥郭熙山

山光水色尋常好看看到月明景愈奇瑪瑙坡前波  
浪闊水精丸湧碧琉璃

酒旗搖曳杏花風碧樹芳菲綺陌紅車馬爭投歌  
舞處樓臺多在雨雲中

寶馬驕嘶白日斜揚鞭直到美人家銀箏一曲千  
鍾酒城上更殘起曙鴉

西湖權歌詞

查慎行

湖面平添積雨餘放生池外葑初除誰司水澤加  
恩溥開過桃花未打魚

滇茶紅染鶴頭殷畫檻朱闌點綴間何限兩隄花

柳色却教小景上盆山

亭臺到處羅列盆  
景寶珠山茶尤多

草色纔青柳未齊石函橋北斷橋西琉璃一片樓  
臺影過盡笙歌十里隄

鑿開混沌着丹青落日猶疑處土星白鶴不歸梅  
樹老鷺鷥飛過

御書亭

扁舟載酒泊湖邊鱸膾蓴羹入饌鮮別有錦筵貴  
公子玉簫金管在樓船

湖上

王修玉

蜂喧蝶鬧柰春何拂面香風過綺羅此意少年人  
不會第三橋畔落花多

弄潮天氣中秋後競渡風光午日前併與西風作



寒食人生行樂趁今年

湖上漫興

王式丹

康樂遊山興未孤尋詩今更到明湖西冷橋畔天

如水留得一枝如蓋無

予十六年湖上詠西冷橋古松云一枝如蓋暮天清

南屏春暮好閒行徙倚斜陽見落英樹底一方春

水綠塔巔十丈晚霞頰

西湖留別

湯右曾

放船已過賈亭西一帶丰茸草没隄忽聽危樓動  
殘角斷橋回首便淒迷

舞裙歌板小嬋娟詞客偏於別恨牽蘇小小家春

在否幾株楊柳認門前

疎星幾點漸窺簷天際空濛水欲黏待遣老龍吹

鐵笛催將銀海上金蟾

似此歡遊未偶然風埃蓬勃動經年明朝人事侵

尋去愧與山靈續後緣

送喬介夫之西湖

湯右曾

幾隊笙歌載酒行白頭無復少年情時時夢到湖  
心寺浴佛前期爲放生

二十年應無此湖

東坡奏議中語

沙填葑合水將枯何人

更似峨眉老添得長虹一綫無

子歸先合到吾鄉五月風漪菡萏香好作新詩嘲

杜甫西湖涼較鑑湖涼

放舟西湖夜半始歸

周起渭

錢塘門外煙如織放鶴亭邊水似油棹撥綠醅衣

染翠小舟一葉漾中流

城中拄頰看青山寄興飛鴻落照間煙靄帶人行

不進棟花風裏棹舟還

煙水瀾漫晚棹迷峰巒出沒翠鬢低數聲短笛臨

風急千縷殘霞落向西

輕煙淡粉各叢叢水色天光晚盡融却是畫師描

不就夜山燈火碧流中

題西湖畫冊

沈名蓀

一座團焦幾樹梅好山橫處正窗開此中可有林

和靖露下鶴眠人未回

湖水平橋新漲流小船棹出鴨灘頭白雲如絮山

如墨知是前邨雨未收

面面清屏擁翠巒  
條條寒玉激鳴湍  
茅齋最愛臨  
溪築一徑迴塘竹萬竿

湖上尋宋山言次升稚佳諸昆不值

吳允嘉

野店山橋日色曛  
花林蹋遍不逢君  
祇疑同跨孤  
山鶴直上雙峰弄白雲

西湖雜詩

黃任

珍重遊人入畫圖  
亭臺繡錯與茵鋪  
宋家萬里中  
原土博得錢塘十頃湖

聖母湖山孝養多  
旃車信誓竟如何  
可憐太乙宮  
王祝早已無他望  
九哥

魚羹宋嫂六橋無  
原是樊樓舊酒壚  
宣索可憐停  
玉食官家帶泪話  
東都

風松一闕觀天顏  
殘酒重攜已半酣  
莫笑酸寒于  
上舍酒旗歌板有  
終南

荷花十里桂三秋  
南渡衣冠足卧游  
爭唱柳屯田  
好句汴州原不及  
杭州

明月香風十二層  
半間亭子晚來登  
內家五夜凭

高望指點湖山正上燈

梅花亦作黍離看野水荒墳遠一灣腸斷黃金臺  
下客更傳天語到孤山

珠襦玉匣出昭陵杜宇斜陽不可聽千樹桃花萬  
條柳六橋無地種冬青

畫羅紈扇總如雲細草新泥簇蝶裙孤憤何關兒  
女事踏青爭上岳王墳

梨花無主草空青金縷歌殘翠黛凝魂斷蕭蕭松  
柏路滿天梅雨下西陵

圍香築土賈秋壑鍊汞燒鉛葛稚川一片初陽臺  
上月照他富貴與神仙

不獨徽欽事可憐難英廟仗公賢他時不怨藏  
弓禍曾見天朝復辟年

刺史笙歌學士禪倪迂楊鐵竹枝篇只今耆舊無  
新語風月銷沉四百年

懶慢無心上畫橈青旗沽酒不曾招不知細雨裙  
腰草綠徧春風第幾橋

西湖志卷之三十九

總校王詒壽分校

金肇麒  
吳鳳階校

西湖志卷之四十

藝文十

詞

憶江南

唐白居易

江南憶最憶是杭州山寺月中尋桂子郡亭枕上看潮頭何日更重遊

河滿子

陪杭守泛湖夜歸

宋張先

溪女送花隨處沙鷗避樂分行游舸已如圖障裏小屏猶畫瀟湘人面新生酒艷日痕更欲春長衣上交枝

西湖志 卷四十一  
鬪色釵頭比翼相雙片段落霞明水底風紋時動熒光  
賓從夜歸無月千燈萬火湖塘

山亭宴

湖亭燕別

宋張先

碧波落日寒煙聚望遙山迷離紅樹小艇載人來約樽  
酒商量岐路衰柳斷橋西共攜手攀條無語水際見鷺  
鳧一對對眠沙渚西陵松柏青如故翦煙花幽蘭啼  
露油壁間花驄那禁得風吹細雨饒他此後更思量總  
莫似當筵情緒鏡面淥波平照幾度人來去

望海潮

宋柳永

東南形勝三吳都會錢塘自古繁華煙柳畫橋風簾翠  
幙參差十萬人家雲樹繞隄沙怒濤卷霜雪天塹無涯  
市列珠璣戶盈羅綺競豪奢重湖疊巘清佳有三秋  
桂子十里荷花羌笛弄晴菱歌泛夜嬉嬉釣叟蓮娃千  
騎擁萬牙乘醉聽歌鼓吟賞煙霞異日圖將好景歸去  
鳳池誇

菩薩蠻

西湖送述古

宋蘇軾

秋風湖上蕭蕭雨使君欲去還留住今日謾留君明朝  
愁殺人佳人千點淚灑向長河水不用斂雙蛾路人

西湖志

卷四十一 藝文十

二

啼更多

好事近 湖上

宋 蘇軾

湖上雨晴時秋水半篙初沒朱檻俯窺寒鑑照衰顏華  
髮 醉中欲墮白綸巾溪風漾流月獨棹小舟歸去任  
煙波飄兀

行香子 懷舊

宋 蘇軾

攜手江村梅雪飄裙情何限處處銷魂故人不見舊曲  
重聞向望湖樓孤山寺湧金門 尋常行處題詩千首  
繡羅衫與拂紅塵別來相憶知是何人有湖中月江邊

柳隴頭雲

浣溪沙 五月西湖

宋 蔡伸

雙鳳雷文拂手香青紗衫子淡梳粧冰姿綽約自生涼  
虛掉玉釵驚翡翠緩移蘭棹趁鴛鴦鬢鬟風亂綠雲  
長

臨江仙 與客湖上飲

宋 葉夢得

不見跳珠翻曲港湖邊特地經過蕭蕭疎雨亂風荷微  
雲吹盡散涼月墮平波 白酒一杯還徑醉歸來散髮  
婆娑無人能唱采菱歌小軒欹枕簟簷影掛星河

水龍吟 西湖燕客

宋 葉夢得

對花常欲留春恨春故遣花飛早晚來雨過綠陰新處  
幾番芳草一片飄時已知消滅滿庭誰掃料多情也似  
愁人易感先催趁朱顏老 猶有清明未過但狂風匆  
匆難保酒醒夢斷年年此恨不禁煙草只恐春工應留  
芳信與花爭好有姚黃一朵殷勤付與送金杯倒

畫堂春

游西湖有感

宋 趙長卿

湖光乘雨碧連天繞隄映草芊芊舞風楊柳欲吹綿依  
依起翠煙 還是春風客路對花空負嬋娟暮寒樓閣

碧雲間羅袖成斑

柳梢青

臨安春會汎湖

宋 曾覲

花柳爭春湖山競秀恰近清明綺席從容蘭舟搖曳穩  
汎波平 君恩許宴簪纓密座促仍多故情一部清音  
兩行紅粉醉入嚴城

又

游湖

宋 曾覲

湖岸千峰嵌巖隱映綠竹青松古寺東西樓臺上下煙  
霧冥濛 波光萬頃溶溶人面與荷花共紅撥棹歸歟  
一天明月十里香風

西湖志

卷四十一 藝文十

四



西湖志 卷四十一 西湖  
小重山 與客游西湖

宋 辛棄疾

綠漲連雲翠拂空十分風月處着衰翁垂楊影斷岸西  
東君恩且教重種芙蓉 十里水晶宮有時騎馬笑兒  
童殷勤却謝打頭風船兒住且醉浪花中

摸魚兒

湖上

宋 杜 旗

泛扁舟萬山環處平鋪碧浪千頃仙人憐我征塵久借  
與夢游清枕風乍靜兩岸羣峰倒浸坡黎影樓臺相映  
更日薄煙輕落花似醉飛鳥墮寒鏡 城闌內羅綺千  
街萬井天教此地幽勝仇池仙伯今何在隄柳幾眠還

醒君試問問此意只今更有何人領功名未竟待學鴟  
夷仍攜西子來動五湖興

阮郎歸

西湖春暮

宋 馬莊父

清明寒食不多時香紅漸漸稀番騰妝束闌蘇隄留春  
春怎知 花褪雨絮沾泥淩波寸不移三三兩兩叫船  
兒人歸春也歸

烏夜啼

西湖

宋 盧祖臯

漾暖紋波颭颭吹晴絲雨濛濛輕衫短帽西湖路花氣  
撲青驄 鬪草寒衣濕翠秋千瞥眼飛紅日長不放春

醪困立盡海棠風

卜算子

春晚泛西湖同寅齋賦

宋 高觀國

屈指數春來彈指驚春去檐外蛛絲網落花也要留春住  
幾日喜春晴幾夜愁春雨十二雕牕六曲屏題徧傷春句

蝶戀花

湖頭卽席

宋 高觀國

西子湖邊眉翠嫵魂冷孤山誰是風煙主相喚吟詩天  
欲雨嫩涼不隔鷗飛處移下天孫雲錦渚翠蓋牽風  
綽約凌波女清約已成君記取月明夜半魚龍舞

賀新郎

西湖月下

宋 史達祖

同住西山下是天地中間愛酒能詩之社船向西陵佳  
處放塵世必無知者暑不到雪宮風榭楚竹忽然呼月  
上被東西幾葉雲縈惹雲散去笑聲罷清樽莫爲嬋娟  
瀉爲狂吟醉舞毋失晉人風雅踏碎橋邊楊柳影不  
聽漁樵閒話更欲舉空杯相謝北斗以南如此幾想吾  
曹便是神仙也問今夜是何夜

點絳脣

六月十四夜與社友泛湖過西泠橋已子夜矣

宋 史達祖

山月隨人翠蘋分破秋山影釣船歸盡橋外詩心迴

多少荷花不盡鴛鴦冷西風定可憐潘鬢偏浸秦臺鏡

青玉案

西湖路

宋韓 滉

蘇公隄上西湖路柳外約青驄去多少韶華驚暗度南  
山游遍北山歸後總是題詩處 如今老矣傷春暮澤  
畔行吟漫尋句拓落情懷空自許小園芳草短籬修竹  
點點飛花雨

菩薩蠻

湖上

宋洪 璪

吳姬壓酒浮紅蟻少年未飲心先醉駐馬綠楊陰酒樓  
三月春 相看成一笑遺恨知多少回首欲魂消長橋

連短橋

掃花遊

西湖寒食

宋吳文英

冷空淡碧帶翳柳輕雲護花深霧艷晨易午正笙簫競  
波綺羅爭路驟捲風埃半掩長蛾翠嫵散紅縷漸紅濕  
杏泥愁燕無語 乘蓋爭避處就解珮旗亭故人相遇  
恨春太妬濺行裙更惜鳳鈎塵污醉入梅根萬點啼痕  
樹峭寒暮更蕭蕭隴頭人去

賀新郎

湖上有贈

宋吳文英

湖上芙蓉早向北山山深霧冷更看花好流水茫茫城

下夢空指游仙路  
 杳笑羅障雲屏親到雪玉肌膚春温  
 夜飲湖光山滌成花貌臨澗水弄清照  
 着愁不盡宮  
 眉小聽一聲相思曲裏賦情多少紅日欄干鴛鴦枕那  
 枉裙腰褪了算誰識垂楊秋裊不是秦樓無緣分點吳  
 霜羞帶簪花帽但滯酒任天曉

西子妝

夢窗自度腔  
湖上清明薄遊

宋 吳文英

流水麴塵艷陽釀酒畫舸游情如霧笑拈芳草不知名  
 乍凌波斷橋西堍垂楊漫舞總不解將春繫住燕歸來  
 問絲綉繡手如今何許 歡盟悞一箭流光又趁寒食

去不堪衰鬢著飛花傍綠陰冷煙深樹元都秀句記前  
 度劉郎曾賦最傷心一片孤山細雨

渡江雲

西湖清明

宋 吳文英

羞紅顰淺恨晚風未落片繡點重茵舊隄分燕尾桂棹  
 輕鷗寶勒倚殘雲千絲怨碧漸路入仙塢迷津腸漫回  
 隔花時見背面楚腰身 逡巡題門惆悵墮履牽縈數  
 幽期難準還始覺留情轉眼帶減因春明朝事與孤煙  
 冷做滿湖風雨愁人山黛映澄波淡滌無痕

摸魚兒

西湖游春

宋 陳允平

倚東風畫欄十二芳陰簾幕低護玉屏翠冷梨花瘦寂寞小樓煙雨腸斷處悵折柳柔情舊別長亭路年華似羽任錦瑟聲寒瓊簫夢遠羞對彩鸞舞文園賦重憶河橋眉嫵啼痕猶濺紈素丁香共結相思恨空託繡羅金縷春已暮縱燕約鶯盟無計留春住傷春倦旅趁暗綠稀紅扁舟短棹載酒送春去

曲遊春

游西湖

宋周密

禁苑春風外颺暖絲晴絮春思如織燕約鶯期惱芳情偏在翠深紅隙漠漠香塵隔沸十里亂絲叢笛看畫船盡入西村閑却半湖春色柳陌新煙凝碧映簾底宮眉隄上游勒輕暝籠寒怕梨雲夢冷杏香愁冪歌管醉寒食柰蛺怨良宵岑寂正恁醉月搖花怎生去得

秋霽

秋日游西湖

宋周密

重到西泠記芳園載酒畫舸橫笛水曲芙蓉渚邊鷗鷺依依似舊相識年華易失斷橋幾換垂楊色謾自惜愁損庾郎雙鬢點華白殘蛩露草怨蝶寒花轉眼西風又成陳迹歎如今才消量減尊前辜負醉吟筆欲寄遠情秋水隔舊遊空在凭高望極斜陽亂山浮紫暮雲凝

碧

祝英臺近

重過西湖書所見

宋張炎

水西船山北酒多為買春去事與雲消飛過舊時雨謾  
留一掬相思待題紅葉柰紅葉更無題處 正延佇亂  
花渾不知名嬌小未成語短棹輕裝逢迎斷橋語那知  
楊柳風流柳猶如此更休道少年張緒

春從天上來

自東越還西湖飲  
靜傳董高士書樓

宋張炎

海上回槎認舊時鷗鷺猶戀蒹葭影散香消水流雲在  
疎樹十里寒沙難問錢塘蘇小都不見擘竹分茶自堪

嗟向荻花江上誰弄琵琶

煙霞自延殘照盡換了西

陵窈窕紋紗蝴蝶飛來不知是夢猶疑春在鄰家一掬  
幽懷難寫春何處春已天涯減繁華是山中杜宇不是  
楊花

聲聲慢

西湖

宋張炎

晴光轉柳曉氣分嵐何人野渡橫舟斷柳枯蟬涼意正  
滿西州匆匆載花載酒便無情也是風流芳晝短柰不  
堪秋夜秉燭來遊 誰識山中朝暮向白雲一笑今古  
無愁散髮吟商此興萬里悠悠清狂未應似我倚高寒

隔水呼鷗須待月許多情都付與秋

採芳信

西湖春感

宋張炎

坐清晝正冶思縈花餘醒倦酒甚採芳人老芳心尙如  
舊銷魂忍說繁華事不是因春瘦向西園竹掃頽垣蔓  
延荒翫風雨夜來驟歎歌冷鶯簾恨凝蛾岫愁到今  
年多似去年否賦情懶聽山陽笛目極空搔首我何堪  
老却江潭深柳

高陽臺

西湖春感

宋張炎

接葉巢鶯平波卷絮斷橋斜日歸船能幾番游看花又

是明年東風且伴薔薇住到薔薇春已堪憐更淒然萬  
綠西冷一抹荒煙當年燕子知何處但苔深韋曲草  
暗斜川見說新愁如今也到鷗邊無心再續笙歌夢掩  
重門淺醉閒眠莫開簾怕見飛花怕聽啼鶯

多麗

西湖

宋石孝友

晚山青一川雲樹冥冥正參差煙凝紫翠斜陽畫出南  
屏館娃歸吳臺游鹿銅仙去漢苑飛螢懷古情多凭高  
望極且將樽酒慰漂零自湖上愛梅仙遠鶴夢幾時醒  
空留得六橋疎柳孤嶼危亭待蘇隄歌聲散盡更須

攜妓西泠藕花深雨涼翡翠菰蒲軟風弄蜻蜓澄碧生  
秋鬧紅駐景采菱新唱最堪聽一片水天無際漁火兩  
三星多情月為人留照未過前汀

繫梧桐

別西湖社友

宋李珣

楓葉濃於染秋正老江上征衫寒淺又是秦鴻過霽煙  
外寫出離愁幾點年來歲去朝生暮落人似吳潮展轉  
怕聽陽關曲柰短笛喚起天涯情遠雙屣行春扁舟  
嘯晚憶着鷓鴣苑小小梅花屋雪月後記把山扉牢  
掩惆悵明朝何處故人相望但碧雲半斂定蘇隄重來

時候芳草如剪

柳梢青

憶西湖

宋姚勉

長記西湖水光山色濃淡相宜豐樂樓前湧金門外買  
箇船兒而今又是春時清夢只孤山賦詩綠蓋芙蓉  
青絲楊柳好在蘇隄

臨江仙

西湖春泛

宋趙潛

隄曲朱墻近遠山明碧瓦高低好風二十四花期驕驄  
穿柳去文鷁挾春飛簫鼓晴雷殷殷笑歌香霧霏霏  
閑情不受酒禁持斷橋無立處斜日欲歸時



探芳訊

湖上春遊繼草窗韻

宋 李彭老

對芳晝甚怕冷添衣傷春疎酒正緋桃如火相看自依  
舊閉簾深掩梨花雨誰問東陽瘦幾多時漲綠鶯枝墮  
紅鴛鴦 隄上寶鞍驟記草色薰晴波光搖岫蘇小門  
前題字尙存否繁華短夢隨流水空有詩千首便休言  
張緒風流似柳

曲遊春

清明湖上次草窗韻

宋 施岳

畫舸西泠路占柳陰花影芳意如織小楫衝波度麴塵  
肩底粉香簾隙岸轉斜陽隔又過盡別船簫笛傍斷橋  
翠繞紅圍相對半篙晴色 頃刻千山暮碧向沽酒樓  
前猶繫金勒乘月歸來正梨花夜綺海棠煙幕院宇明  
寒食醉乍醒一庭春寂任滿身露濕東風欲眠未得

沁園春

西湖酒樓

宋 陳人傑

南北戰爭惟有西湖長如太平看高樓倚郭雲邊矗棟  
小亭連苑波上飛費太守風流遊人歡暢氣象年來都  
斬新鞦韆外贖釵駢玉燕酒列金鯨 人生樂事良辰  
況鶯燕聲中長是晴正風嘶寶馬軟紅不動煙分彩鷁  
澄碧無聲倚柳分題藉花傳令滿眼繁華無限情誰知

道有種梅處士貧裡看春

沁園春

西泠橋作

宋 錢繼卓

已遠喧闐漸覺幽涼無過西泠正微霜欲下滿船楓葉  
枯荷未盡幾點殘螢鐘入蒼煙山黏遠樹拋卷方知午  
夢醒悠然起看文魚唼藻野鶴梳翎 安排綠酒青燈  
擬陶寫閒愁向水汀恰薑絲調醋新登蟹俎蕨芽研粉  
留作萼羹頗怪山童近添閒供露菊秋葵插滿瓶陶然  
醉任人呼馬走我已鴻冥

菩薩蠻

湖上卽事

元 劉 因

樓前曲浪歸橈急樓中細雨春風濕終日倚危闌故人  
湖上山 高情渾似舊只在東風瘦薄晚去來休裝成  
一段愁

朝中措

湖隄晚歸望葛嶺諸山倒影水中昔趙文敏公常欲畫此故及之

元 張 翥

梅花處處滿枝開酒力蕩吟懷煙染藏鴉萬縷東風扶  
起春來 幽禽啼樹戲魚跳日水碧如苔若箇仙翁畫  
得翠微倒影樓臺

婆羅門引

七月望西湖舟觀水燈一鼓歸宴楊山居山樓達曙

西湖志

卷四十一

藝文十

七

暮天映碧玻璃十頃藥珠宮金波湧出芙蓉誰喚川妃  
微步一色夜妝紅看光搖星漢起舞魚龍 月華正中  
畫船漾藕花風聲度鸞簫縹緲雁柱玲瓏酒闌興極更  
移上瓊樓十二重殘醉醒煙水連空

八聲甘州

秋日西湖泛舟午後  
遇雨

元張翥

向芙蓉湖上駐蘭舟淒冷勝游稀但西陵橋外北山隄  
畔殘柳依依追憶鶯花舊夢回首冷煙霏惟有盟鷗好  
時傍人飛 聽取紅顏象板儘歌回彩扇舞換仙衣正

白蘋風急吹雨暗斜暉空惆悵離懷未展更酒邊忍又  
送將歸江南客此生心事只在漁磯

摸魚兒

春日西湖泛舟

元張翥

漲西湖半篙新雨麴塵波外風軟蘭舟同上鴛鴦浦天  
氣嫩寒輕暖簾半捲看一縷歌雲不礙桃花扇鶯嬌燕  
婉任狂客無腸王孫有恨莫放酒杯淺 垂楊岸何處  
紅亭翠館如今遊興全嬾山容水態依然好惟有綺羅  
雲散君不見歌舞地青蕪滿目成秋苑斜陽又晚正落  
絮飛花將春欲去日送水天遠

多麗

清明飲西湖壽樂圖

元張翥

鳳凰簫新聲遠度蘭橈漾東風湖光十里參差綠港紅  
 橋暖雲蘸鬱金衫色晴煙抹翡翠裙腰電畫名園鬧紅  
 芳樹蒲葵亭畔綵繩搖鴛鴦落英堪藉猶作殢人嬌漬  
 羅袂莫愁痕退生怕香銷憶當年尊前扇底多情冶  
 葉倡條分蘭女隔花偷盼修禊客臨水相招舊約尋歡  
 新聲換譜三生夢裡可憐宵縱留得棟花寒在啼鴉已  
 無聊江南恨越王臺下幾度回潮

蝶戀花

西湖感舊

元葉森

小院閑春愁幾許日斷行雲醉憶曾游處寂寞而今芳  
 草路年年綠遍清明雨花影重簾斜日暮酒冷香溫  
 幽恨無人顧一陣東風吹柳絮又隨燕子西冷去

八聲甘州

戊申再到西湖

元張埜

憶湖光醉別幾經春千里每神馳恨無窮煙水無情歲  
 月無限相思冰雪從來憑眺風沙夢覺山色碧參差忙  
 對玻璃鏡照我塵姿欲寫從前離闊便安排舊畫準  
 備新詩見六橋遺構煙雨強撐支怨東風紅銷翠減比  
 向來渾是老西施如何得劉郎雙鬢長似當時

水龍吟 題湖山勝槩寺 元張埜

翠微曾共登臨冷光潏灩三千頃玉京佳處景雖天造也因人勝若把西施淡粧濃抹兩相比並道此間如對姮娥仙子慵梳掠臨鴛鏡 滿意曲闌芳徑早安排雨篷煙艇茶甌雪卷紋楸霞碎醉魂初醒湖海高情林泉幽意幾人能領算知音只有中宵涼月浸蓬萊影

賀新郎 題王守西湖書院 元劉鎮

雲淡天垂野望晴郊疎煙半捲斷虹低跨老樹連陰藏遠景十里湖光照夜看不盡真山圖畫春滿軒窗無着處更銀蟾冷浸鴛鴦瓦人共境轉幽雅 文章太守歸來也似當年和靖風流小孤山下問訊佩蘭餐菊友曾約梅兄入社待付與竹臞陶寫塵外閑尋行樂地任傍人歌舞喧臺榭詩世界有王謝

望江南四首 為太原陳壅千戶賦西湖景 明瞿佑

西湖景春日最宜晴花底管絃公子宴水邊羅綺麗人行十里按歌聲  
西湖景夏日正堪遊金勒馬嘶垂柳岸紅妝人泛采蓮舟驚起水中鷗

西湖景秋日更宜觀桂子岡巒金粟富芙蓉洲渚采菱  
閒爽氣滿前山

西湖景冬日最清奇賞雪樓臺評酒價觀梅園圃訂春  
期共醉太平時

滿庭芳 西湖秋泛

明 瞿 佑

露葦催黃煙蒲駐綠水光山色相連紅衣落盡辜負採  
蓮船點檢六橋楊柳但幾個抱葉殘蟬秋容晚雲寒雁  
背風冷鷺鷥肩 華筵容易散愁添酒量病減詩顛况  
情懷冲淡漸入中年掃退舞裙歌扇盡付與一枕高眠

清閑好脫巾露髮仰面看青天

憶秦娥 湖上次韻

明 史 鑑

湖邊寺樓臺舊是春遊地春遊地千花張錦兩山橫翠  
西風闌檻秋無際青山不改朱顏異朱顏異斷橋楊  
柳伴人憔悴

念奴嬌 西湖

明 張文秀

平湖秋霽見銀蟾光閃波紋搖綠天上飄來風韻細桂  
子香生金粟玉戶玲瓏瑤臺皎潔影落嫦娥屋夜深雲  
際一聲誰弄橫竹 醉倚六曲雕闌望中懸白練兩峰

垂瀑淨洗塵腸摘秀句一唾珠璣千斛更欲凌空鏗鏘  
環珮仙駕驂鸞鳴鳳棲人遠獨憐不見秦玉

摘得新

西湖感舊

明夏言

猶是西泠橋畔難尋春柳春花只有婆婆老樹夕陽依  
舊棲鴉

清平樂

游西湖用王介甫韻

明陳霆

香車隘住笑揭紅蓮語淺蹴芳塵羅襪汗堤上未乾花  
雨畫船載得琵琶醉中情思無涯不管湖煙湖水東  
風取意飛花

水慢聲

西湖

明屠隆

一片大湖何限浸空城碧浪崔巍白日孤懸畫屏四合  
翠微裏湧出樓臺落盡桐花飄殘柳絮正芙蓉冉冉將  
開衣上冷香飛欲濕輕鷗如帶蘭槳共滌洞天放閒  
人時容傲吏水雲深處相對且銜杯君莫對此景浪生  
憂喜請看層波疊疊前後相催楚楚舞裙盈盈歌扇零  
落總成灰君去也西湖無恙歌舞又重來

小重山

湖上春遊

明裘律

山遶平湖寺遶山隄邊千樹柳綠絲繁杏花嬌倚玉欄

西湖志 卷四十一  
干秦樓畔小鳥語綿蠻 紅粉試輕紈笙歌吹畫舫漾  
飛鸞酒旗撩亂繫雕鞍春色暖芳草弄晴灣

國朝

滿江紅

西湖感舊

董俞

繡甸春濃酒帘外青山無數還記得桃花滿院劉  
郎前度紅燭畫橈臨別酒碧簫殘兩相思路看韶  
光零落斷橋邊斜陽暮 無限景煙中樹無限意  
風前絮對澄湖如鏡玉人何處豔影尙疑花欲笑  
離情只有鶯能訴歎西陵松柏自年年風流誤

惜分飛

湖上有贈

王士祿

淚眼非如潮有信話到離愁便暈此際看尤俊橫  
波那爲多啼損 家住西泠還較近蘇小同心試  
問莫忘相思分却教油壁全無準

忘分並  
瓜聲

唐多令

西湖春雪

唐濟武

路斷捕魚汀煙迷放鶴亭望雙峰晝掩銀屏欲訪  
剡溪人盡去誰識得少微星 梅落笛難聽暗香  
供素瓶擘藤箋欲告山靈明日六橋花外路須早  
放柳條青



綺羅香 西湖清明

吳綺

風報桐花雨吹榆片春事三分啼鴉人在湖頭正  
值禁煙初熟看十里入眼風光是一歲銷魂時節  
又誰禁南北峰頭紙錢恰化孤山蝶 樓邊紅袖  
徙倚聽得賣餠人過玉笙吹微笑指西陵松柏何  
年堪結莫等待潑火罪微却做作打毬周折且分  
付簫鼓樓船載多情夜月

青玉案 紫雲洞

吳綺

遙看鳥道渾無路但一澗沿花去澗盡忽逢雲宿

處藤蘿日月莓苔今古撐得媧天住 陰陰石磴  
鳴仙鼠百狀虬龍向人舞足下分明聞客語沾衣  
空翠濛濛煙霧忽作山中雨

一痕眉碧 湖上行春

丁澎

風送畫橋春淥戲水紫鴛爭逐柳花落盡短長亭  
偏亂惹低鬟綠 人倚翠樓如玉忍使嫵眉長蹙  
鷓鴣飛上竹枝啼停尊且盡吳娘曲

鷓鴣天 西湖卽事

徐鉉

似鏡湖光正可憐六橋楊柳更含煙朱樓窈窕迷

芳樹石馬淒涼冷墓田 人似玉酒如泉朝朝攜

上木蘭船盡聽商婦彈紅淚猶擲歌兒買笑錢

翠華引 題湖心亭 徐 鉉

絃筦四時繚繞樓臺三面參差山色喜晴喜雨湖

光宜酒宜詩

望江南 湖上同萬年少聯句 胡 介

寒食後千里見湖山暮雨自能催客淚春風不住

送人船今日記今年 少年 殘照裏歸去獨登樓短

笛杏花看過馬紅衫窄袖控吳鉤風景似徐州 彥遠

浣溪紗 西湖早春 朱彝尊

雪帶東風洗畫屏 許渾 便教鶯語太丁寧 杜甫 看花多

上水心亭 張籍 隔岸春雲邀翰墨 高適 傍檐煙雨濕

巖扃 韋莊 瓦甌斟酒暮山青 崔道融

南歌子 早秋西湖 朱彝尊

桂楫中流望 丁仙芝 荷花鏡裏香 李白 無數紫鴛鴦 余延

壽 嬋娟江上月 劉長卿 拂羅裳 閻朝隱

多麗 湖上贈竹逸 陸嘉淑

愛明湖晚來千頃秋清更霧髻雲鬟不定吳山鷺

嶺南屏遙天接三層西竺輕綃捲一片孤城紅糝  
江楓青留岸草百年風景見昇平高低繞名園別  
墅處處倚雕楹笙歌好尋芳拾翠棹槳縱橫待  
重來山川如昨一尊寂寞頻傾成煙空橫飄斷角  
山鐘暗怒吼霜鯨紫燕空歸塞鴻不斷西風緊處  
聽殘鶯還應賴登臨讌集相向寫幽情高吟罷客  
歸人醉纖月初生

又西湖

吳農祥

夢澄湖畫橋春水初生指嫋娜東風吹晚朦朧西

日籠晴雕梁棲雙飛社燕瓊樓閃百轉流鶯潮信  
蒸梅雨梢墜柳惱人情緒是清明平沙軟爭攜新  
月壓浪小舟輕追歡好爲他拚醉醉也還傾待  
空閨重尋消息繡簾同出江城玉釵垂暖圍紫蓋  
珠衣薄難掩紅屏拾翠時光踏青心事香塵蕩去  
促歸程冶遊久歌慵舞罷寂寞已三更徒贏得歲  
華紀盡越鼓吳笙

倦尋芳

湖上春遊

邵錫榮

嫩柳搖風天桃凝露十分春色灑灑湖光影漾畫

樓簾額驟金鞍揚寶轡踏殘芳草連錢碧看家家  
正除煙斷火初逢寒食 六橋邊芳菲未老一陣  
飛花驀地狼籍又被鶯啼啼落滿隄斜日望去青  
帘飄野店酒濃如霧吹還濕醉歸時聽孤村數聲  
橫笛

長相思

西湖秋景

梁允植

楓葉紅柿葉紅誰染丹青峭壁中霜寒五兩風  
白雲封碧雲封雲鎖南屏第幾重長廊薄暮鐘

小重山

西湖晚眺

梁允植

錦帶橋頭叫杜鵑雪初晴正是落霞天紅塵漸負  
碧山緣偷閒處湖水散鳴弦 春色在籬邊小隄  
梅欲吐又殘年何時返棹米家船看雁影箇箇入

幽燕

臨江仙

湖上

陸鴻圖

十二橋頭春事早花間試買屠蘇小姑十五學當  
鑪可憐垂素手不慣數青蚨 踏碎殘紅隄路滑  
杖頭珍重葫蘆東風吹雨過平蕪欲尋逋老約喚  
取醉翁扶

瑣窗寒

憶西湖四時

孫琮

十二橋頭四時簫鼓屢繁心  
曲晚霧朝煙風靜水紋如縠  
踏青遊鶯燕撩人蒲觴競看  
飛鳧速正荷香盪槩萬檠翠  
蓋千頃紅玉遙矚澄湖面有  
微曉明燈錦團霞簇清秋浩  
月夜夜盤桓難足喜重陽雨  
後初晴葱菁草樹如新沐更  
羣巒積雪憑高望兩峰三竺

昭君怨

西湖暑遊

徐士俊

昨日南屏蕭寺今日西泠梅峙  
銷夏柳陰邊小篷

船纔買旗亭茶醉又趁蓮塘香  
睡白雪映清漣

鷺鷥肩

念奴嬌

湖夜

嚴繩孫

浮生夢裡更能得幾度人間  
今夕西子湖頭秋已半清景  
似曾相識銀渚雲開珠胎月  
滿一片傷心碧姮娥知否照  
人如此清切試望蘇小西陵  
如今松柏盡難尋油壁星火  
樓臺永夜舟不是舊游蹤跡  
病憶愁吟有荷花笑我百端  
交集數聲何處夜分猶自吹  
笛

金菊對芙蓉 西湖

毛際可

烏桕開餘蕙花零後斜陽目送賓鴻正煙嵐深處  
暫息游筇憑高一色天連水見飛來怪石玲瓏西  
陵橋畔蘭舟畫舫一葉杯中喚起絕壑癡龍把  
珠璣萬斛灑向池東更碧筒徐引曲折流通家僮  
敲石燒茶竈試新泉蠓眼松風歸來月下回頭精  
舍宵靜聞鐘

點絳脣

與梁九坐斷橋

沈進

鏡裏秦箏聽來無限清秋怨畫船分散一抹銀波

爛折得荷花爭似情人面西風亂浮雲天畔雁  
字虛傳徧

蝶戀花

西湖述感

沈進

客裏秋聲驚別緒竹雨荷風日日消殘暑水國涼  
生漁唱起晴雲綠處移柔櫓側帽看山誰是主  
數遍紅樓樓下沾清醕臨水小窗聞燕語珠簾不  
捲歌金縷

采桑子

湖上春遊

沈進

玉鞭去馬嬌無力草似情濃柳似心慵翦翦輕衣

蛺蝶風 纔移綠水船窗近南也高峰北也高峰

兩處花飛一片紅

南樓令

泛月至湖心亭

沈進

落月四無塵天青雁幾羣倚輕橈客過前津未老

芙蓉秋有恨對粧鏡翠蛾顰 亭子隔湖心花深

月轉深聽宵鐘空外遺音絲竹不分山水興約明

日再登臨

柳梢青

西湖後遊

沈進

十二重樓是誰珠箔雙掩銀鈎桃葉春潮楊花暮

雨一段閒愁 飛來沙際輕鷗芳草外春風舊遊

團扇歌殘羅衣試罷人在蘭舟

菩薩蠻

春日憶西湖次陸蓋思徐竹逸倡和原韻

陳維崧

劃波曾向西泠去掠入綠痕難唾處疎簾雜眠鷗

眞成自在遊 如今佳興歇悶過春三月剛見摘

蘭芽山村又焙茶

柳梢青

和沈山子西湖後遊

李符

前度芳遊裙腰草外淥漾輕舟渡口飛花波心掠

燕人倚紅樓 重來緩控嘶騶悄不見疎簾上鈎

一鏡空香雙螺斜照都是春愁

秋霽

泛舟西湖薄暮坐湖心亭待月

龔翔麟

買酒西泠正蕭蕭雨歇白羽風淨別浦喧禽長隄  
無柳六橋空帶煙暝采菱歌靜劃波又見拏魚艇  
但目極南北兩岸斜照亂紅影湖心亭子遊屐  
都歸留與吾曹夜涼飲謝多情纖阿放彩鴛鴦露  
宿不知冷半被朗吟驚乍醒夢梁堪憶紅蕖種滿  
芳塘月中香遠一奩秋錦

吳山青

湖上遇雨

龔翔麟

南高峰北高峰好在空濛雨色中煙鬟霧鬢重  
藕花紅蓼花紅不比當年秋興濃采香何處逢

柳梢青

西湖後游和沈山子

龔翔麟

十二橋邊紅消燕夜綠漲鶯天楊尾梳風櫻珠捎  
雨日上歌船依然鈿翠生煙認亭子湖心扣舷  
勸酒僧歸鑿詩壁壞苦憶嬋娟

南鄉子

烏石山房卽目

龔翔麟

千縷裊茶煙消受松風一榻前小雨初收簾試捲  
山四面洗出佛頭青萬點



臨江仙

西湖秋泛

查慎行

記得樓亭春侍讌，滿湖燈燭熏天。一番光景換尊前。殘荷猶瀉雨，疎柳已無蟬。望望西泠橋外去，吟過第六橋邊。商聲輓上十三絃。晚風吹不斷，涼

透鷺鷥肩

桂殿秋

湖樓感興

沈季友

葛嶺背斷橋頭，青山何事不勾留。愁人怕見西湖面，冷雨疎花共一樓。

點絳脣

湖上

釋正巖

來往煙波此生自號西湖長，輕風小槳盪出蘆花港。得意高歌夜靜聲偏朗，無人賞自家拍掌唱得千山響。

西湖志卷之四十

總校王詒壽分校沈琮寶  
吳鳳堦校

